

ՔՆՆԱՐԿՈՒՄ
2009 Թ. ՏԻՄ ԸՆՏՐՈՒԹՅՈՒՆՆԵՐԸ
ԹՈՒՐՔԻԱՅՈՒՄ

**ԱՆՍՊԱՍԵԼԻ ԱՐԴՅՈՒՆՔՆԵՐ ԹՈՒՐՔԻԱՅԻ ՏԻՄ
ԸՆՏՐՈՒԹՅՈՒՆՆԵՐՈՒՄ
(ՀԱՐՑԱԶՐՈՒՅՑ)**

«Թուրքիայում տեղի ունեցած տեղական ինքնակառավարման մարմինների ընտրություններն անսպասելի արդյունքներ են գրանցել», - այսօր ասուլիսում ասաց Արևելագիտության ինստիտուտի տնօրեն Ռուբեն Սաֆրաստյանը: Նրա խոսքով, 2002 թվականից իշխող Արդարություն ու Ջարգացում կուսակցությունն առաջին անգամ իր արդյունքներում նվազում է գրանցել:

Կուսակցությունն ընտրություններում հավաքել է ծայների մոտ 39-40%-ը, ինչն էլ զիջում է խորհրդարանական ընտրություններում նրանց հավաքած ծայներին: Վարչապետ Էրդողանը շատ լուրջ է ընդունել այս արդյունքները, համարել դա ժողովրդի կողմից ուղարկված հորդոր՝ որոշակի քաղաքականություն վերանայելու համար: Նույնիսկ արդեն խոսք է գնում, որ կարող են փոփոխություններ տեղի ունենալ կառավարության կազմում, - ասաց Ռ. Սաֆրաստյանը:

Թուրքագետի հավաստմամբ, ընտրությունների այսպիսի ելքի պատճառները կարելի է տեսնել առաջին հերթին տնտեսական ճգնաժամի մեջ, որը մեծ ազդեցություն է թողնում Թուրքիայի վրա: Երկրում գործազուրկների թվի աննախադեպ աճը, տնտեսական զարգացման տեմպերի թուլացումը, և մյուս կողմից՝ ակնհայտ դարձած այն իրողությունը, որ իշխող կուսակցությունը շարունակում է թուրքական քաղաքական էլիտայի ավանդույթները, որի համաձայն կուսակցությունը նույնպես մխրճվում է կոռուպցիոն սկանդալների մեջ, ժողովրդի մեջ թուլացրել է կուսակցության հանդեպ ունեցած երբեմնի հավատը:

Ընտրություններում երկրորդ կարևոր դեպքը, ըստ Ռ. Սաֆրաստյանի, Պանթուրքիստական ազգայնական կուսակցության

ծայների ավելացումն է: Այս անգամ, տվյալ կուսակցությունը ծայների 17 %-ն է հավաքել, ինչն էլ, թուրքագետի խոսքով, լավ արդյունք է: Շարունակելով Թուրքիայում տեղական ինքնակառավարման մարմինների ընտրությունների դրական արդյունքների թվարկումը, Ռ. Սաֆրաստյանը նկատեց, որ քրդաբնական շրջաններում քրդական ժողովրդավարական հասարակության կուսակցությունը կարողացել է հաղթանակի հասնել, մասնավորապես, հաղթանակ է գրանցվել Դիարբեքիի քաղաքապետի ընտրություններում: Իսկ մինչ այժմ, իշխող Արդարություն ու Ջարգացում կուսակցությունը կարողանում էր հաղթանակներ գրանցել մեծ քաղաքներում:

Մասնագետի խոսքով, հատկանշական է, որ ինչպես անցյալ մի քանի ընտրություններում, այս անգամ էլ Ստամբուլի մերձավոր որոշ շրջանների ընտրություններում ընտրվել են նաև հայ թեկնածուներ՝ ինչպես Արդարություն ու Ջարգացում կուսակցությունից, այնպես էլ՝ հիմնական ընդդիմադիր ժողովրդահանրապետական կուսակցությունից:

Ընդհանուր առմամբ, գնահատելով Թուրքիայում կայացած ընտրությունները, թուրքագետ Սաֆրաստյանը նշեց, որ տնտեսական ճգնաժամը որոշակի ազդեցություն է սկսում ունենալ Թուրքիայի քաղաքական կյանքի վրա: Քաղաքական զարգացումները երկրում չեն ընթանում շատ ու շատ քաղաքական վերլուծաբանների կանխատեսած ուղով: Իսկ ընտրության արդյունքները հայ-թուրքական հարաբերությունների վրա լուրջ ազդեցություն չեն կարող ունենալ, քանի որ մասնագետի հավաստմամբ, Արդարացում ու Ջարգացում կուսակցությունը պահպանում է իր դիրքերը Թուրքիայի ներքին քաղաքական կյանքում, ուստի՝ արտաքին քաղաքական կյանքում կտրուկ փոփոխությունների չի կարելի սպասել:

<http://www.Panorama.am>, 30/03/2009